

Bbaruha Gyakasatu Ginyakuhandiikwa Yohaana Kwanjuura

Bbaruha gigi gyegebeerwe nka *Bbaruha gya Yohaana gyakasatu*, gyahandiikiirwe mukwenda Yohaana. Beitū Yohaana yeezeta kwahi muhandiiki, kyonkei yeezeta muhandu wa kitebe kya beikiriza ba Yesu Kurisito. Yaagihandiikiiri mwikiriza wa Yesu Kurisito akwetwa Gaayo, munyakubba naali mwebemberi wa beikiriza ba Kurisito (1:1).

Mu bbaruha gigi muhandiiki akuhaariiza Gaayo haḥwa birungi byensei bibaakoleeri beikiriza ba Kurisito bandi. Kandi de akumanyisya kitebe kya beikiriza ba Kurisito beegyendereze mudulu gibakweta Diyotereefe, ali na bikorwa bibiibi, atahondera bya Yohaana mwebemberi byaragira.

Bicweka Bihandu bya mu kiki Kitabbu nka Kubihonderegeeni

- (i) Ntandiko gya kitabbu 1:1-4
- (ii) Yohaana niyeekambisya kandi naaragira Gaayo atangiire kurungi beikiriza ba Kurisito beira baamwe 1:5-8
- (iii) Diyotereefe nibamusalira musangu 1:9-10
- (iv) Demeturiyo nibamubazaho kurungi 1:11-12
- (v) Byakumaliira 1:13-15

Biramukyo

¹ Gyagya muhandu, nkuhandiikira we Gaayo, munywani wange ginyendya mu mananu.

² Munywani wange, nkukusabira aleke obbe na hwomi hurungi, kandi de nti bintu byenseenya bikugyendere kurungi, nka kwoli kurungi mu mwozo.

³ Nyaasemereerwe hoj bamweji ha beikiriza ba Kurisito beira beetu hubeiziri nibakatuweera nka kwokwekam-biranga mananu kandi noogahondera kwo. ⁴ Tindi na kintu kikubora kumpa kusemererwa kukwijanjana na kwegwa baana bange nka kubakuhondera mananu.

Kufangaho Baheereza ba Mukama

⁵ Munywani wange, oli mwesigwa mu bintu byokukoora beikiriza ba Kurisito beira baamu, naabuwaakabba otabeegiri. ⁶ Beikiriza bahwo baweereeri kitebe kyensei kya beikiriza ba Kurisito ha ngonzi zooli nazo. Kikwiza kubba kirungi we kubabboheera mu luyendu lwahu mu mulingo gukusiimwa Ruhanga.

⁷ Baabyokeerye lulwo luyendu hahwa kuweera bantu bigambu bya Kurisito kandi baacwamwo huteikiriza husagiki kuruga hali muntu yensei munyakubba atali mwikiriza wa Kurisito. ⁸ Nahawakikyo twe beikiriza ba Kurisito tukusemeera kutatiirya bantu nka bahwo, aleke tusobore kukoranga nabo mulimo gwa kusaasaania mananu.

⁹ Ndi na bintu binyaahandikiiri kitebe kya beikiriza ba Kurisito, beitu Diyotereefe, yogwo yendya kwebembera bantu bensei, eikiriza kwahi bintu bindagira.

¹⁰ Nahawakikyo kiro nkwiza, ndibeizukya bintu bibiibi byakukora, na bibyo bibiibi byakutubazaho. Asambiriiri kwahi hahwo hasa, beitu asuula naakutangiira beikiriza ba Kurisito beira beetu kandi de naagaana na bahwo bendya kubatangiira, kandi de naababinga mu kitebe kya beikiriza.

¹¹ Munywani wange, oteikirizanga kuhondera bikorwa bibiibi, beitu ohonderenge bikorwa birungi. Muntu akora

bintu birungi abba wa Ruhanga, kandi yogwo akora bintu bibiibi takawonanga Ruhanga.

¹² Demetiriyo, bantu benseenya bamubazaho kurungi, na mananu nago nigamuheera bukeiso. Twedede tumubazaho kurungi kandi de okyegiri nti bukeiso bwetu buli bwa mananu.

¹³ Ndi na bintu binene byakukumanyisya; beitu kandi, nkwendya kwahi kukoresya kalaamu na wiino kubikuhandiikira. ¹⁴ Nkunihira kukuwona bwangu kandi tukwiza kubaza meiso na meiso.

¹⁵ Businge bwa Ruhanga hubbe nawe. Banywani baamu bakuramukiirye. Oturamukiirye buli omwe mu banywani beetu.

Ndagaanu Gihyaka

Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 13 Jun 2022

b2d1b010-ce36-53f8-94bb-ea31f34239cc